

613  
128



# QVÆSTIO MEDICA

CARDINALITIIS DISPUTATIONIBVS

MANE DISCVTIENDA

IN SCHOLIS MEDICORVM,

Die Iovis 23. Februarij.

M. MATHVRINO DENYAV, Doctore Medico:  
& Professore Regio, Præside.

*An Sedes Somni sit cor?*

I.

**N**ULLVS sensus in actione versatur absque ope spirituum, hinc animalibus somni vigiliæque vicissitudo necessaria est, cum subtiliores illorum spiritus ob rariorem substantiam faciliè resolvantur, nec sufficiens fieri possit eorum restauratio sola partium quiete, si spiritus ab humore alibili minimè se junctos exceperis, sed præterea caloris, cujus virtute sunt educendi, & humoris, è cujus sinu prodeunt contractionem & revocationem ad sui officinam exposcant: Sensuum igitur externorum functiones omnes intermitteri necessum est, si spirituum influxus inhibeatur obstructâ viâ, quæ pertingit ad ostia communis sensus, in quem undique velut in centrum externæ facultates, rerum perceptarum imagines quasi lineas transmittunt, vicissimque ab eo, ut à piscinâ, spirituum animalium derivationem excipiunt. Sic somnus est vinculum primi sensorij, ac proinde ligatio est omnium sensuum externorum ad animantium quietem & salutem instituta; opposita verò vigilia est omnium sensuum externorum aut saltem aliquorum solutio & libertas, quippe ratio somni plus excludit, quàm vigilia includat; omnes sensus externi à functionibus cessant, aut infirmius exercentur, dum somno tenemur, quo nihil morti similius, tunc enim corpus amicâ vi soporis elisum, blandæ quietis necessitate prostratum, immobile quodammodo situ, quale post vitam jacebit.

II.

**H**UNC in finem natura in somno spiritus omnes colligit ad proprium fontem, atque ad intima corporis penetralia, hinc partes externæ

dormientium frigide, quæ spirituum intro recessu hebetius sentiunt: ita dum ex puriorum spirituum repressione seu resolutione devinciuntur animalis directio ac puriorum sensuum usus, sonnus obrepit, recreator corporum, redintegrator virium, probator valetudinum, pacator operum, Medicus laborum, cui legitime fruendo dies cedit, nox legem facit, auferens rerum etiam colorem. Quando enim sensus externi tempore somni quiescunt, collecta ad functiones internas obeundas spirituum animalium dispendia reparat, vitalis facultas in sinistro cordis thalamo vitales spiritus impensius elaborat, virtus concoctrix in alimentum coctionem perfectius incumbit, & reliqua munia majore agendi robore perficit. Hac autem ex alimentoeducta evaporatio ad superiora simulque remotiora perducta, cum ulterius ascendere non possit, inferiora repetit, frigidorumque membrorum virtute frigidior densiorque facta, non tantum perturbat ac caliginosos reddit spiritus puriores sensuum organum inservientes, eademque capitis superiora insitâ levitate petentes, verum etiam comprimit & ad proprium fontem retrudit, cor scilicet calidissimum & humidum, vitæ principium, primum sensorium, regem totius microcosmi, qui caloris & spiritus vivifici, à quo omnia geruntur & pendent, opifex ac largitor est munificentissimus.

I I I.

**P**ROXIMA scilicet somni naturalis causa est influentis calidi ad viscera retrocessus & contractio, hoc absente, actionum organa necessarii feriantur: Princeps hujus revocationis causa est anima sui domicilij provida rectrix, ut omnem spiritus exhalantis mox futuram jacturam præcediat, ejus damna refarciat, & organorum lassitudinem inductâ requie demulceat. Est enim homini præfixus à naturæ Opifice finis, ut vitam rationalem, sive actuosam, sive contemplativam ducat: huic proximè divinæ vitæ destinata sunt omnia animalia organa, quæ intellectui expeditum optatumque obsequium deferunt. Vitalis spiritus, qui eandem cum spiritu animali dicto naturam & substantiam habet, ac solum accidente, nempe refrigeratione differt, ad functiones animæ obeundas exigitur, qui cum æthereæ & tenuissimæ substantiæ sit particeps, facile tenues in auras vanescit, in cuius locum alius atque alius continenter substituendus est; cuius materia est vapor sanguinis in cordis promptuario elaborati jugi ac perenni ejusdem actione, aliàs spiritus vitæ ipsa deficeret, quamvis totus sanguis in vaporem facesseret. Hinc accedit, ut nimius corporis aut animi labor in li-pothymiam aut syncopem exolutis spiritibus hominem præcipitet, & organa fatiscant, doloremque aut alterationem, aut tensionem, aliâve unionis solutione patiantur non sine gravi damno. Hoc consilio natura partibus, quæ actione perpetuâ agitari debuerunt, cujusmodi sunt cor & pulmo inter contrarios diafoles & systoles motus, breves quietes indidit, ne deficerent labore indefinente fatigatæ.

I V.

**P**ORRO cum contrariorum sit una & eadem disciplina, unum idemque subjectum, somnus & vigilia uni eidemque animæ parti & subjecto

tribuenda sunt: non quidem intelligenti facultati, cùm bruta sicut & homines has passiones sustineant: nec naturali, cùm in somno potissimum vigeat, suasque operationes expeditius absolvat, majus enim ex unione caloris instrumentarij opificis robur illi comparatur: quin & plantæ non dormiunt, quæ tamen naturali animæ facultate donatæ sunt. Itaque sentientis potentia passiones sunt somnus & vigilia, cùm omnes sensus ab anima sentiente originem ducant, & consopiantur in somno, excitentur in vigiliâ: at sentientem vim in corde tanquam in regio tribunali considerare necessaria principum potentiarum unio arguit, earumque gestiones vel ipso sensuum testimonio id comprobant. Somnus igitur est cordis affectio: quia ut sensus omnes conquiescunt, dum consopitur facultas quæ eos omnes è suo sinu profert, sic omnia sensuum organa necessario eoque arctissimo vinculo ligantur, ubi diminutum atque coarctatum est commune omnium sensoriorum sensorium, eamque ob causam quæ naturæ legibus continetur, absque ulla noxâ eorum quæ ad vitam pertinent, ut in hypothyriâ & syncope, epilepsiâ, præfocatione, & id genus aliis accidit, in quibus sensus obtorpescunt, & vi morbi feriantur, quoniam in *hæmon* animalis virtutis defectui adjungitur facultatis naturalis seu vitalis compressio, qua vitales spiritus, sanguis & vis vegetatrix simul contrahuntur ac debilitantur: in epilepsiâ & uteri strangulatu ideo laborantes sensu ac dirigendi virtute destituuntur, quoniam colli & gutturis venis intumescuntibus, respirationis ad vitam necessaria organa impediuntur ac comprimuntur.

## V.

**N**ATURÆ ALIS somni causa statuenda est caloris à corde in cerebrum partesque superiores elatio; & quemadmodum ex terrâ irraguâ vapores ab imo attrahuntur, maximèque cùm sol radios calidiores spargit; ita in nostri opificij solo evenit, cibis intra nos per innatum calorem ebullientibus: cùmque calor suapte naturâ sit mobilis & sursum tendat, è partibus humidis vapores elicit humoreque imbuatur; quo quidem gravior effectus, ad inferiores partes devolvitur, & ad cordis venas unde prodierat revertitur: quas gravans & incompletâ obstructione calorem ingeminante occludens quodammodo & infarciens somnum accersit; idcirco infantes & qui pituitâ redundant, somniculosi sunt, senes verò & melancholici pervigiles: quia in illis vapores non aliter ac fumus per ipsas membrorum quasi parietum commissuras penetrant & in superiora capitis evadunt & convolant; inde verò ad meatus organorum sensuum delati, passim se se permiscunt, sicque sensum omnem otiosum reddi necesse est; in his verò, quia sicciores sunt, nulla fit blanda anathymiasis: Eadem de causâ qui venas habent angustas, in somnum valde sunt propensi, quia humor vaporis crassior facillimè venas exiles infarcit: sic animalia statim à cibo potissimum somnum incunt, multi contrâ ob inedia noctes infomes traducunt, quia vapores suppeditat alimenti copia, negat inopia. Quardam edulia & potiones, ut amygdala dulcia, dactili seu palmulæ, lac, vinum, lactuca, buglossa, flores nymphetæ, aliaque similia dicuntur somnifera, quia plurimòs

vapores sursum efferunt, & cerebrum humenti suavique halitu irrigant; venasque ac ductus per quas spiritus commeant quadantenus obstruunt. In quâ igitur parte fit prima & remota alteratio sanguinis & spirituum conciliando somno accommodata, illa etiam sedes seu instrumentum somni erit remotum, sed præcipuum: Hoc verò fit in corde, nam nemine refragante ad ipsum vapores, quos calor è cibo humido eduxit, per venas frigidi & humidi deferuntur, & in ipso spiritus humectantur & frigescent: Accedit finis somni, scilicet instaurare & confirmare vires animalium. Ejus igitur sedes in eo membro agnoscenda est, à quo totius corporis vires prodeunt & roborantur.

*Ergo Sedes Somni est Cor.*

Proponebat Lutetiæ CLAVDIUS BIENDISANT;  
Aquenſis, A. R. S. H. M. DC. LXVIII.

---

PARISIIS,  
Ex Typographia FRANCISCI MUGUET, Regis ac Illust.  
Archiepiscopi Parisiensis Typographi.